



Na osnovu člana 2.9 stav (1) tačka 1) i 9) Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22 i 51/22) i člana 18. Poslovnika Centralne izborne komisije Bosne i Hercegovine („Službeni glasnik BiH“, br. 29/18 i 25/20), Centralna izborna komisija Bosne i Hercegovine je na 61. sjednici, održanoj 10.10.2022. godine, donijela

N A R E D B U

- (1) Centralna izborna komisija Bosne i Hercegovine, radi pravilnog objedinjavanja rezultata izbora na biračkim mjestima u izornoj jedinici Republika Srpska, po službenoj dužnosti, naređuje Glavnom centru za brojanje da izvrši otvaranje vreća sa glasačkim listićima, izvrši ponovno brojanje glasačkih listića, te utvrdi i objedini rezultate izbora sa svih 2239 redovnih biračkih mjesta u Republici Srpskoj, uključujući i biračka mjesta u Brčko distriktu Bosne i Hercegovinu, sa opcijom glasanja za Republiku Srpsku, za nivo predsjednika i potpredsjednike Republike Srpske.
- (2) Ponovno brojanje glasačkih listića, izvršit će se u skladu sa dinamikom koju će utvrditi direktor Glavnog centra za brojanje, u objektu „ZETRA“ u ulici Alipašina bb, Sarajevo, o čemu će se blagovremeno obavjestiti posmatrači i javnost u Bosni i Hercegovini.
- (3) Prilikom utvrđivanja rezultata izbora iz stava (1) ove Naredbe, Glavni centar za brojanje dužan je da sačini analizu i evidenciju zaprimljenih glasačkih listića, neiskorištenih glasačkih listića, kao i analizu i posebnu evidenciju nevažećih i oštećenih glasačkih listića po svakom biračkom mjestu.
- (4) Ponovno brojanje glasačkih listića iz stava (1) ove Naredbe, izvršiti u skladu sa odredbama Pravilnika o provedbi izbora u Bosni i Hercegovini („Službeni glasnik BiH“, br. 27/22 i 66/22).
- (5) Akreditirani posmatrači političkih stranaka, ispred kojih su ovjereni kandidati za predsjednika i potpredsjednike Republike Srpske i nezavisnih kandidata iz stava (1) ove Naredbe, kao i kandidati koji se pojavljuju na glasačkom listiću, mogu biti prisutni u toku brojanja, kao i akreditirani posmatrači za praćenje Glavnog centra za brojanje.
- (6) Ova Naredba stupa na snagu danom donošenja i objavljuje se na internet-stranici Centralne izborne komisije Bosne i Hercegovine www.izbori.ba, i smatrat će se da je danom objavljivanja, ista dostavljena svim kandidatima političkih subjekata i nezavisnim kandidatima, kao i akreditiranim posmatračima.

O b r a z l o ž e n j e

Centralna izborna komisija Bosne i Hercegovine zaprimila je primjedbe i prigovore na izborni proces za predsjednika i potpredsjednike Republike Srpske.

Imajući u vidu broj prigovora koji su dostavljeni Centralnoj izornoj komisiji BiH za koje bi dokazni postupak trajao dugo, kao i brojnu video i drugu dostavljenu dokumentaciju o toku

izbornog procesa, a u cilju pravovremenog utvrđivanja rezultata izbora i zaštite integriteta izbornog procesa, Centralna izborna komisija Bosne i Hercegovine je u skladu sa odredbom člana 2.9 stav (1) tačka 1) i 9) Izbornog zakona Bosne i Hercegovine, postupajući po službenoj dužnosti, donijela ovu Naredbu.

Protiv ove Naredbe nije dozvoljena posebna žalba.

Broj: 05-1-07-11-2195-1/22
Sarajevo, 10.10.2022. godine

Dostavljeno:

- Glavnom centru za brojanje
- a/a

